



David est receu avec triomphante joye , ayant vaincu le Geant Goliath , dont Saül luy porte enuie.

DAVID ayant occis le Geant Goliath , il porta la teste d'iceluy au Roy Saül , qui l'interogea qui il estoit , & il luy dit . Je suis fils d'Isay Bethléemite ; & lors Ionathan fils de Saül l'ayma pour la vertu & prudence qui estoient en luy , & luy donna ses vestemens & ses armes. Ainsi Saül le retint à son service , & le constitua sur ses hommes de guerre , ne permettant qu'il retournast à son pere , car il estoit agreable à ses yeux. Mais quand David retourna avec Saül , rapportant la teste du Geant en Ierusalem , les femmes de toutes les Citez sortirent avec les instrumens de Musique chantans & dansans deuant le Roy , disans : Saül a frappé mil Philistins de nos ennemis , & David en a frappé dix mille ; dont Saül fut courroucé , & dit , Elles ont donné loüange à David de dix mille , & à moy d'un mil : que luy reste-il plus que le seul Royaume ? Et depuis Saul ne regardoit point David de bon œil. Toutesfois David estoit estimé de tout Israël qui fut cause que Saul luy promist sa fille Merob en mariage : Mais David aymoit l'autre fille nommée Michol , qu'il épousa avec condition qu'il apporterait cent prepuces des Philistins. Ce qu'il fit , ayant deffait iceux en Accaron , où il remporta vne memorable victoire.